

B. N. C.
FIRENZE
1036
27




1036.27



DEBICANDI

656.

B.



1036-27

9G.2

1036.27

ΣΥΝ ΘΕΩ
DISCUSSIO
HÆRESEON
A E R I I

Quas Protestantibus Pontificij impingunt
Circa

DISCRIMEN EPISCOPORUM ET PRESB.
PRECES, ET OBLATIONES PRO DEFUNCTIS:
STAT A IEIVNIA; &c.

PRÆSIDE
IOACHIMO HILDEBRANDO,
S. THEOL. D. EJUSQUE
ORDIN. PROF.

IN ACADEMIA JULIA

Publico examini exposita

AB

HENRICO AL-^o Elbinga-Prusso

Ad diem xvi^o Maij

IN IVLEO MAIORI.

— 00 —

HELMESTADI,

Typis HENNINGI MULLERI Acad. Typ.

ANNO c18 lxxvii.



NOTES

...

...

...

...

...

...

...



QUADRIGÆ
IN INCLVTA ELBINGENSIVM REPVBICA
AMPLISSIMORVM VIRORVM

DN. THOMÆ HESIO

ILLUSTRI BURGGRABIO REGIO

DN. MICHAELI HELWING.

MAGNIFICO PRÆSIDI

DN. ISRAELI HOPPIO

DN. MICHAELI SIEFERTO.

NOBILISSIMIS PRÆCONSVLIBVS

DNN. Fautoribus, studiorum meorum uni-
cis Promotoribus, & Mecænatibus Maximis,
submissa animi reverentiâ semper
prosequendis

*FELICITATEM, JUXTA QVÆ AETERNVM
OBSERVANTIÆ CULTVM.*



Uanta ijs, ILLUSTRIS DN. BVRG-
GRABIE REGIE, MAGNIFICE DN.
PRAESES, NOBILISSIMI DN. PRAE-

CONSULES, AMPLISSIMI VIRI! qui gubernacula Reipublicæ tenent, & laudabili eadem administrant operâ, incumbat Religionis cura & meditatio, ex ipsis Ethnicis Tulliana Oratorum suada & Philosophorum Parens quamplurimis in locis testatum reliquerunt, è quibus unicum in præsens producere libet.

Orator equidem Religionem non tantum rem sanctissimam, & eum, qui hanc violat, perniciosum Patriæ civem fore, sed etiam sanctitate & Religione sublata, perturbationem vitæ & magnam confusionem sequi existimat. Philosophus verò Plato in l. de Republ. πρῶτον τὴν περὶ τὸ θεῖον ἐπιμέλειαν, i. principem rerum divinarum curam gerendam esse censet. Quibus Augustissimi è Christianis Imperatores suffragijs suis non desunt, dum ita sanctiunt: *Decere arbitramur nostrum Imperium nostros subditos de Religione commonescere; ita enim & pleniorum acquiri Dei & Salvatoris Iesu Christi benignitatem possibile esse existimamus.* Quæ testimonia non possunt non ab ijs, quibus veluti columnis Publica res innititur, acceptari & firmiter animo infigi. Quod si sanctissimum, quem divina providentia per manus veluti tradi atque

culto-

custoditè ad nos transmitti concessit, inspiciamus codicem; pientissimorum sapientissimorumq; Regum de excòlenda religione maxime sollicitorum exempla utramq; complere paginam reperiemus, imò fundamentum & bahn eandem omnium esse rerum nos clarè docebunt. David vir apud Deum exploratæ sanctitatis, ejusque filius Salomon prudentiâ nulli mortalium secundus, toti in vero Dei cultu suam in Rempublicam, cujus fundator ipse Jehova erat, introducendo & conservando strenuè occupabantur, ac cum primis divina oracula maximæ sibi curæ cordique esse reapse exprimebant. Quid? annon Magistratus eam ob causam *Deorum* (hoc enim nomine eundem sacra compellat pagina) fungitur munere, dum cogitationes suas eò unicè intendit, ut pura ac orthodoxa vigeat floreatq; Religio. Idem innuere Dei spiritus videtur, quando dulci admodum *Nutriciorum* elogio reipublicæ præsides insignit, utpote hanc partem haud abimiles illis, qui tenellis infantibus lac præbent. Ut verò hæc divini muneris particula conspectius non nihil sese prodatur, aliud

insuper accedere debet. Quemadmodū enim naucleri interest, non tantum celo faventem optime regere, sed quoque tum maxime, cum decumani fluctuum insurgunt impetus, sacram, quod ajunt, ancoram jaccere, pariterq; ne navicula vi deprimatur ac pessum eat, æstuantium, undarum moli, quoad licet, obniti; pari modo pium Magistratum tyrannorum hæreticorum, S. Sancto numini ejusque in verbo revelatæ veritati fidem derogantium insultus comprimere, imò nisi sanioris mentis spes sit reliqua, è Patriæ finibus exturbare decet. Quibus omnibus animo meo invicem collatis ac ultrò citroq; habitis, rectà ad Vos ducor PATRIÆ LUMINA, & ad Vos humillime compellandum facile invitor. Optime siquidem de eo constat, quanta penes Vos hætenus fuerit animi sollicitudo, ne non in vestris quoque finibus sinceræ & puræ religionis locus maneret, neque unquam deessent, qui sanos divinæ veritatis sermones quasi instillarent, cujus rei cum quamplurima ad sint testimonia, quid verbis vel circuitione opus

est

est? testem meipsum adduco, qui à VOBIS & AMPLISSIMO SENATU jam per triennium in hac illustri bonarum artium & disciplinarum sede, itemque virorum omnis doctrinæ laude præclarissimorum veluti choro, stipendio satis amplo exornatus vixi. Neque animum meum unquam latent ingentia vestra merita in B. meum Parentem & me jam dum à primis annis collata, quibus etiam nunc fruor, adeò quidem, ut gravem à me culpam committi dicendus essem, nisi publicum tandem eorum extaret testimonium, quod tamen summis vestris beneficijs longè inferius esse, quam ut eorum dignitati ex æquo respondere valeat, haud inficiaseo. Interim MAGNIFICA vestra NOMINA huic meæ Dissertationi Theologicæ præfigere visum fuit: quæ complectitur discussionem sequiorum dogmatum veteris sive hæretici sive Schismatici Aerij, à Roberto Bellarmino acerrimo olim Romanæ Curiae propugnatore ac tantum non principe, nostris quoque Ecclesijs subdolè ac falsè imputatorum. Respicite quæ socandem ac (quod

alias

alias consuevistis) sereno excipite vultu, me-
que vestrum clientem ulteriori benignæ men-
tis affectu clementer prosequi ne dedigne-
mini, quod observanter oro, obsecro, ob-
testor. Si enim de Vestra in me meaue
studia benevolentia certi quid mihi porro
polliceri potuero; erit sanè, quod Musis meis
Vestra Munificentia hic loci ad maiorem
perfectionem Bono cum Deo perducendis
gratulari denuò queam, de quo & mente &
manu quod ajunt, stipulata sanctè compro-
mitto. Deus ex alto Vos VIRI MAGNIEICI
INCLVTVMQVE PATRIAE SENATVM
umbra alarum suarum protegat, consilijs
benedicat, pacemque in vestris finibus redo-
net: Fiat hoc propter Iesum Christum Salva-
torem nostrum unicum. Fiat!

V.V.V.V. M.M.M.M.

humilimus cliens

HENRICUS ALTYS.

Discussio

HÆRESEON

AER II,

Quas Protestantibus Pontificij impingunt.

THESIS I.

AB initio usque Ecclesiæ reperti sunt, qui optimè dicta & facta in peiorem partem rapuerunt omnia. Memorabili ejus rei exemplo est primitiva Ecclesia, & quibus indignus erat Orbis, martyrum ille candidatus exercitus. De his cum pagani audirent, quod carnem Filij hominis comederent ejusque sanguinem in SS. Eucharistia biberent Ioh. vi. 53. calumnia sparsa est Christianos infanticidas esse & anthropophagos. Cum charitatis, quam supremis tabulis Dominus commendaverat, memores se invicem blando fratrum ac sororum nomine appellarent, & hi postea connuberent, pagani promiscuam Venerem vagamque libidinem & incestas nuptias iisdem affinxerunt. Cum in Præcibus ad Solem Orientem sese converterent, per calumniam ipsis Heliolatria impacta est. Cum in publicis iisque nocturnis Sacris coram Sacerdote verba præcunte in genua provoluti orarent, genitalia Presbyteri adorare dicti sunt. Cum Deos non colerent, athei; cum statuas Cæsarum non adorarent, læsæ Majestatis rei habiti sunt, quæ calumniæ odium immane apud infideles Ecclesiæ constarunt, sed ab ejus ævi

A

Patrī-

Patribus Tertulliano, Iustino Martyre, Minutio Felice alijsque per libellos apologeticos fortiter reusæ sunt.

II. Proinde mirum videri non debet, cum similem fortunam Orthodoxorum Ecclesia hodiernum subit, quæ ab adversariis multarum, quæ dudum ab Orbe Christiano damnatæ sint, novoque paxillo suspensæ, hærescon postulat, ut in vulgus exosa vel veterum errorum suspecta saltem fiat. Ita Cardin. Bellarminus lib. iv. de Ecclesia c. ix. *corollam viginti hærescon* texit eamque modernis sectarijs, quos vocat, præsertim Lutheranis imponere satagit. Leonh. Lessius in Consultatione sua dimidiato numero veteres hæreses decem Nostratibus impingit. Alij plures, pauciores alijs. Inprimis tres sunt hæreses, quas sub aliqua qualicunque tandem specie (nam quæ de cæteris adferunt, aperta sunt mendacia, quæ vel recitasse refutasse est) Protestantibus affingunt. Affirmat enim Bellarminus nos Aerianos, Iovinianos, Vigilantianos esse. *Aeriani*, inquit, *docebant, orare vel offerre pro mortuis oblationem non oportere; statim solenniter celebranda jejunia non esse, sed cum quisque voluerit jejunandum, ne videatur, esse sub lege; Presbyterum ab Episcopo nulla differentia debere discerni, ut legere est apud Epiph. har. LXXV. & S. August. lib. de har. c. XXXIII. Eadem docent & faciunt Lutherani* ferè omnes. *Iovinianus* inter alia docuit ciborum delectum & jejunia non esse meritoria. Idem error habetur in August. Confess. art. XXIV. *Iovinianus* conjugium calibatus dignitate & merito æquavit. Similia habet Lutherus in Epithalamio & August. Conf. art. XXIII. *Vigilantius* docuit, reliquias Sanctorum non esse venerandas, orationes mortuorum pro alijs non exaudiri, Clericos debere esse uxoratos; non expedire relinquere omnia & dare pauperibus relictaque seculo ad religionem properare. Itarefert de utroque hæresiarcha S. Hieronymus. Eadem omnia, quæ Vigilantius, docent nunc sectarij &c. Hæc ad eum modum Bellarminus.

III. Abup-

III. Abundè quidem ad has calumnias à Nostratibus responsum est, sed nos exercitij gratia spicilegium post messem instituemus & duabus posterioribus Ioviniani & Vigilantij sectis in aliud tempus reservatis, unam Aerij hæresin spectabimus eamque à Protestantium Ecclesia devolvemus. Prænotanda h. l. est falsa Bellarmini hypothesis existimantis omnes ac singulos errores, quos S. Irenæus, Hieronymus, Epiphanius, Philastrius, Augustinus, Theodoretus in catalogis hæreseon collocarunt, revera hæreses esse & in Veteri Ecclesia ab omnibus tales habitas fuisse, cum (ait) vero non sit simile sanctos illos & doctos viros inter hæreses retulisse dogmata, de quibus dubitari seivissent in Ecclesia; cum nemo etiam hos Patres propterea, quod innocentes hæreticis connumerarint, uspiam accusaverit. Verùm hæc argumenta Topica sunt, quæ nondum evincunt, quod debebant. Esto, viri sancti & docti fuerint, qui Hæresiologia texuerunt, meminisse Bellarminum debuit, quod nemini quamvis docto & sancto viro ubique luceat. Esto, quod à nemine ob malè recensitam unam alteramve hæresin fuerint reprehensi, fortè id ideo factum, quod honori ipsorum legentes pepercerint nec Patrum pudenda detegere voluerint. Nævosi sanctissimis quoque Patribus reperiri extra est dubium, qui rectius tacentur, nisi ut propalentur, necessitas postulet.

IV. Ut cæteros hæresiographos hac vice prætereamus, unus Philastrius, Brixienſis Episcopus, scriptor ipſo S. Augustino antiquior clarus una cum S. Ambrosio sub Theodosio M. quales nobis Hæreses enarrat? Hæresis illi est, si quis terræmotum à causis naturalibus derivet; si quis cælo Cometas, Pogonias, Hyadas, hædos &c. nomina stellarum, præter ea, quæ in Sacro Codice expressa sunt, asserat; si quis in calculo mundi aberrat; si quis per filios Dei

cum filiabus hominum commixtos angelos intelligat & ex concubitu illo gigantes productos credat; si quis diebus per hebdomada Planetarum, Solis, Lunæ, Martis &c. nomina imponat; si quis diluvium Deucalionis cum diluvio Noæ conferat; si quis in æthere XII signa Zodiaci & stellas fixas nominet; si quis psalmos omnes à Davide scriptos neget; si quis in locum Versionis LXX Interpretum versione Aquilæ Pontici utatur; Hæreses circa uxores & concubinas Salomonis, circa funiculum mensorium Zach. II, 1. circa labia Prophetæ carbone tacta Es. VI, 6. & circa alia talia constituit. De his & similibus hærescos aliquem postulare vel errorem gehenna flammisque æternis expiandum alicui impingere stolidum est, nec pontificios ipsos saltem doctiores in anathematibus evibrandis alias nimium faciles ejuscemodi hæreticorum catalogis per omnia subscripturos existimamus. Dicendum igitur est, quod sancti illi & docti Viri Syllabos hærescon laxiores texuerint & levem sæpe dissensum, non tam ab eo, quod Ecclesiæ, quam quod ipsis verum visum est, hæresibus connumerarint. Non habet Ecclesia ullum catalogum, qui velut authenticus publicè receptus solas verè & in rigore dictas hæreses percenseat. Ex quo patet, Bellarminum labili fundamento & parieti caduco inniti, dum omne dogma, quod hic vel ille privatus Doctor in numero hærescon ponit, ab universa, quæ sub cælo est, Ecclesia pro damnata hæresi habitum putat. Itaq; non sequitur: Acrium v. g. Epiphanius & Augustinus inter hæreticos ponunt. Ergo est hæreticus verè & strictè ita dictus.

V. Ipse S. Augustinus, qui libellum enumeratis hæresibus lectu dignissimum implevit & suo Quod vult deo inscripsit, in limine opusculi fatetur, sibi quid præcisè sit hæresis, non constare. Verba Præfationis hæc sunt: *Quid*

faciat

*faciat hæreticum, regulari quadam definitione comprehendi, si-
 cut ego existimo, aut omnino non potest aut difficilimè potest.
 Videtur igitur S. Augustinus non adeò certus fuisse, an o-
 mnia illa dogmata, quæ ipse inter hæreses collocat, pro
 hæresibus habenda sint necne? Sed si veteres illos cata-
 logos hæreseon notas facere gestiant pontificij, viderint,
 ne ipsi in eodem luto, in quod alios præcipitare satagunt,
 deprehendantur. Prisci enim non ea tantum capita do-
 ctinæ, quæ cum Apostolicis è diametro pugnarunt, sed &
 additamenta fidei, cum sub necessitate salutis vel sub ra-
 tione fundamenti vel tanquam apostolica venditarentur,
 veris & formatis hæresibus (idque fortassis haud injuria) ap-
 posuerunt. Testem hujus rei laudamus S. Augustinum,
 qui de Apostolicorum secta fatur h. m. *Apostolici eo no-
 mine arrogantissimè se vocarunt, eo quod in suam communionem
 non reciperent utentes conjugibus & res proprias possidentes, qua-
 les habet Ecclesia & clericos & monachos plurimos. Sed ideo isti
 hæretici sunt, quia ab Ecclesia se separantes NULLAM SPEM
 PVTANT EOS HABERE, QUI VTUNTUR IIS REBUS,
 QUIBUS IPSI CARENT.* Cap. XL. Et de Eucheris vel Mel-
 saljanis: *Ευχρηται* ab orando sic appellati sunt. Tantum enim o-
 rant, ut eis, qui hoc de illis audiunt, incredibile videatur. Nam
 cum Dominus dixerit: Oportet semper orare & non deficere; &
 Apostolus: Sine intermissione orate (quod sanissimè sic accipitur,
 ut nullo die intermittantur certa orandi tempora) isti ita nimis
 hoc faciunt, ut hinc judicentur inter hæreticos numerandi. Cap.
 LVII. Plura hujusmodi ex Antiquitate proferri possent, si
 instituti ratio pateretur. Sanè vivere in calibatu, nihil ha-
 bere proprii, tempus omne precibus impendere per se ta-
 lia sunt, quæ neminem hæreticum faciunt; at cum veteres
 sectarij ista sub necessitate salutis urgerent nullamq; spem
 habere illos, qui secum non facerent, docerent, in hæresin*

condemnati sunt. Stante hac hypothesi dogmata pontificia v. g. Infallibilitas Papæ, Purgatorium, Transsubstantiatio, Indulgentiæ, Sacrificium Missæ &c. (esto, quod per se Fidei fundamentum non diruant) hæreses tamen censeri debent, quod sub ratione fundamenti, sub necessitate salutis, sub anathemate Ecclesiæ obtrudantur. Sed de his alibi plenius.

VI. Prænotamus porro, quod nudus ab Ecclesia dissensus hæresis non sit, cum fieri possit, ut ipsa Ecclesia (etiam universalis) in aliquibus non fundamentalibus aberraret; infallibilitas enim si qua Ecclesiæ in SS. literis promissa sit, ad dogmata fundamenti, quibus super extructa est Ecclesia, restringenda est. Hinc non sequitur: Acrius diversum quiddam communi Ecclesiæ doctrina statuit. Ergo est hæreticus. Hæresis enim est error Apostolorum doctrinæ SS. literis comprehensæ evidenter oppositus. Cætera dogmata extra apostolica erronea esse possunt, hæretica non item, nisi forte, ut jamjam diximus, sub necessitate salutis vel ceu apostolica urgeantur. Dein prænotamus Acrium à veteribus nonnullis inter hæreticos relatum non tam ob propria dogmata, quæ ex Epiphanio & Augustino Bellarminus recenset, quam ob Arianismum: *In Arianorum enim hæresin lapsus Acrius*, scribit S. Augustinus hæc. LXXI. *propria dogmata* (hæreses non appellat) *addidit*. Epiphanius ita de eo: *Acrius in hunc usque diem vivit in carne, & superest in vita Arius quidem in totum: aliter enim non sentit, quam velut Arius & adhuc ultra amplius ea, quæ Arii sunt, persequatur, acutus lingua & armatus labiis hac in parte*. Hæc. LXXV. Hæreticus itaque in primis ideo fuerit Acrius, quod hæresiarcham Arium secutus æternam ex substantia Patris generationem & essentiam divinam Filio Dei abjudicaverit. Sed hac in parte nec cum Ario nec cum Acrio communica-

nicamus, imò utrique anathema dicimus. Miretur autem aliquis, quod in Ecclesiæ antiqua historia apud Socratem, Sozomenum, Theodoretum Virum in comportandis hæreticorum fabulis alias industrium, Evagrium &c. quos omnes Acrius presbyter vita antecessit, Aeriani nuspam memorentur. Hinc alij coniectant, Aerium cum Ario malè confundi & per injuriã Arianismi (fortè à malevolis episcopis, quibus æquandum se presbyter duxit) acculari, cum adversarios potius Aerij, Eustatianos fidei Homousianæ desertores factos constet. Vid. Lamb. Dantzus in comment. ad August. l. de Hær. lxxi.

VII. Hæreseos *Syllabæ* Basilii M. in lib. de Sp. S. cap. 2. meminit ejusque auctorem constituit Aerium. Hi Syllabas S. Scripturæ rimando sub varijs tricis Arianismum occultare deprehensi sunt. Verba S. Basilij hæc sunt: *Curiosa istorum hominum circa SYLLABAS & dictiones observatio haudquaquam simplex alicui videri possit, neque ad mediocre tendens malum, sed profundum habet atque obiectum adversus pietatem consilium. Contendunt enim ostendere dissimilem esse prolationem Patris & Filij & Spiritus S. tanquam hinc habituri facilem probationem, eos etiam natura disjunctos esse. Habent enim isti vetus quoddam commentum ab AERIO hujus hæreseos principe inventum, qui in epistolis suis aliquando scripsit, ea, quæ secundum naturam dissimilia sunt, dissimiliter proferri ac retrorsum, quæ dissimiliter proferuntur, esse dissimilia secundum naturam. Ad hujus dicti confirmationem citavit Apostolum dicentem: Unus Deus & Pater, EX QVO omnia; & unus Dominus Iesus Christus, PER QVEM omnia. Igitur quemadmodum, inquit, voces se habent inter sese: eodem modo habebunt rerum significatarum natura. Sed inter sese discrepant: PER QVEM & EX QVO. Dissimilis ergo Patri est Filius. Ex hoc morbo nata est de Syllabis curiositas ista: Deo Patri velut eximio-*

portionem attribunt illud: EX QUO. Filio Dei: PER QUEM. Spiritui vero S. IN QUO omnia & hunc syllabarum usum esse perpetuum docent, ut ex discrepantia prolationis simul natura diversitas appareat. Hactenus Basilii, quæ si ita sint, videntur Aeriani tales hypothèses ex Syllabis S. Scripturæ efformasse, unde per facilem consequentiam Arianismus deduci potuit, quo nomine si malè apud Homousianos vulgo ita dictos audierint, nostram non refert, qui tales syllabas non capiamus, sed Patrem, Filium, Spiritum S. tres illos substantialiales unum Deum *ὁμοῦσυστατον* profiteamur, EX QUO, PER QUEM, IN QUO æqualiter omnia. Voces enim istas uni personæ æquè ac alteri, nec uni magis quam alteri competere credimus.

DISCRIMEN EPISCOPORUM ET PRESBYT.

IIX. Sed ut rectius de Aerio nobis constet, juvat ex SS. Antiquitatibus brevem Aerij historiam retexere. Circa A. C. ccc. lx Aerius & Eustatius prope Sebastiam in Insula Ponto minoris Armeniæ monachi, ascetæ vel mandritæ erant & uterque in claustris sacris exercitijs instabant. Mortuo episcopo Sebastie uterque vacantem cathedram ambiit. Per hanc ambitionem nata primum est æmulatio, quæ vel maximè se exeruit, cum in petitione episcopatus repulsam Aerius pateretur, & Eustatius cathedram obtineret. Sed Eustatius veteris commilitonis Aerij benevolentiam captans eundem cænobio evocatum presbyterum suum ordinavit & præterea insigni alicui Xenodochio vel prochorothropeo præfecit. Aerius ita presbyter & Eleemosynarius factus à pristino odio non diutemissit. Indignatus enim, quod absoluta circa pauperes alendos administratio sibi non concederetur, curam pauperum deseruit & ab episcopo suo Eustasio secedens calumniam

niam sparsit, Eustatium avaritiæ deditum bona pauperum ad suos usus convertere. Hæc calumnia cum probabilis vulgo visa sit, quod Eustatius bona illa omnia sub sua *ἐκκλησίᾳ* haberet, Acrius magnam virorum & mulierum multitudinem allexit, cum quibus separatos ad Sacra conventus sub dio in agris & vicis instituit, atque hanc originem *Schismatis Acriani* Epiphanius refert. In illo Schismate Episcopi Aerium ejusque turbam graviter persecuti sunt & in sylvas, ad antra cæca rupium procul à Basilicis abegerant & conventicula Aerij dissiparunt dicentes, non convenire, ut simplex presbyter, qualis erat Acrius, invito episcopo sacros cætus cogeret. His Acrius sublato episcopi & presbyteri discrimine sese oppoluit, dicens: *Quid est episcopus ad presbyterum? Nihil differt hic ab illo. Unus enim ordo est, unus honor, una dignitas. Imponit manus episcopus: ita etiam presbyter. Lavacrum dat episcopus, similiter & presbyter. Dispensationem divini cultus facit episcopus & presbyter similiter. Sedet episcopus in throno, sedet etiam presbyter. In hoc multos decepit, qui ductum ejus sequuti sunt.* Ita vivo adhuc Aerio historiam ejus Epiphanius in Panario suo recenset Hæc, LXXV.

IX. Notandum tamen est, quod nec Eustatius Pontici Episcopus Aerij antagonista famæ adeo bonæ fuerit: nam & hic *Arij dogma*, teste Epiphanio d. l. *ab initio usque ad finem retinuit nec ab hac hæresi persecutiones, quas subijs, abducere illum potuerunt.* Sicut igitur Pontificij circa Episcopi & Presbyteri discrimen à partibus Eustatianorum positi ita argumentantem non ferent: Cujuscunque dogma convenit cum dogmate Eustatij hæretici, is veterem hæresin resuscitat. Pontificiorum circa discrimen Episcopi & Presbyteri dogma est tale. E. Ita puerile quoque est & ferula dignum argumentum, cum contra nos inferunt:

Cujuscunque dogma convenit cum dogmate Aerij veteris hæretici, is Aerij hæresin resuscitat. Lutheranorum circa æqualitatem episcopi & presbyteri dogma est tale. E. Facilis ad Majorem responsio est, quæ licet universalis videatur, revera tamen particularis est in Prima (quod virium vel pueri Logicorum rident) cum hic ejus sensus sit: Cujuscunque ALIQUOD dogma est par ijs, quæ veteres hæretici docuerunt, is veterem hæresin resuscitat: Universaliter enim accipi Majorem non posse evidens est, quod non omne dogma ab hæreticis assertum hæresis sit, nisi tale fuerit, quod cum Apostolica doctrina apertè pugnat vel ab Ecclesia antiqua in hæresin condemnatum est. Alias nemo nescit, hæreticos unam duntaxat & alteram fidei partem negare vel in dubium vocare, at multa cum Catholicis communia adhuc credere, imo nisi id fecerint, non tam hæretici sunt, quam infideles. Ad præsens igitur dicimus: Sicut Eustatius ideo hæreticis non accensetur, quod distinctos esse ordines docuerit sed quod cum Ario Filium Dei in Creaturarum ordinem retulerit: sic & nos de Ario dicimus, hominem illum pro hæretico habitum non quod æquales episcopos & presbyteros fecerit, sed quod in eadem cum Eustatio castra Arii secesserit.

X. Sed rem ipsam contemplemur, circa quam differi non possumus, quod si nihil aliud Aerius docuerit, quam Episcopos & Presbyteros *jure divino* nec ordine nec gradu differere, doctrina illa per se hæretica non sit, cum S. Scripturæ ævoque apostolico & multorum Ecclesiæ Patrum sententiæ conformis sit. Ipsa S. Scriptura eosdem facit hos & illos. Sic Apostolus Act. xx, 17. dicitur Epheso Miletum *Presbyteros* convocasse, quos paulo post habitâ concione *Episcopos* à Sp. S. constitutos affirmat. Et Tit. 1, 5. jubetur Titus opidatim *Presbyteros* constituere vitæ integræ,

tegræ, quod *Episcopum* inculpatum esse oporteat. Petrus
 i epist. v, i *Presbyteros* hortatur, ut velint *ἡμῶν*. *Pres-*
byterium i Tim. iv. 14 dicitur sacros ordines contulisse, quæ
 episcoporum prerogativa olim erat maxima. Apostoli
 ipsi se *Presbyteros* aliosque suos Cooperarios *Compresbyter-*
os appellant. ii Joh. i, i & i Pet. v, i. At Apostoli sub epi-
 scopis non erant. Nomen igitur *Presbyteri* inferiorem
 gradum; qui alium superiorem agnosceret, nondum im-
 portabat. Bellarminus ipse vi veritatis adactus fatetur in
 SS. Literis nomina Episcoporum & Presbyterorum com-
 munia fuisse l. i. de Clericis c. xv.

XI. Sanè Epiphanius ad Aetij argumenta ex Apo-
 stolicis scriptis allata vix solidi quicquam habet, quod re-
 spondeat. Sic enim ait: *Non novit Aetius, qui Consequentia*
Veritatis ignarus est & historias profundissimas non legit, quod
cum recens esset predicatio, S. Apostolus pro re nata velut ha-
bebat, scripsit: Vbi enim Episcopi erant jam constituti. scripsit
Episcopis & Diaconis. Non enim omnia statim potuerunt apostoli
constituere: Presbyteris enim opus erat & diaconis, quia per hos
duos compleri ecclesiastica possunt. Vbi verò non inventus est
quis dignus episcopatu, permansit locus sine episcopo. Vbi autem
opus fuit & erant digni episcopatu, constituti sunt episcopi. Cum
autem multitudo non esset, non inventi sunt inter ipsos, qui presi-
bysteri constituerentur & contenti fuere solo episcopo in loco con-
stituto. Verum sine diacono impossibile est esse episcopum. Et cir-
cam adhibuit Apostolus, ut essent diaconi episcopo propter mini-
sterium. Sic Ecclesis accepit complementa dispensationis, sic illo
tempore erant loci. Nam singula res non ab initio omnia habue-
runt, sed temporis progressu ea, quæ ad necessariorum perfectio-
nem requiruntur, parabantur. Hæc Epiphanius, quibus Aetij
argumenta ex SS. literis circa rem præsentem petita exi-
stimat soluta. Verum Pontificij ipsi fatentur ab Epipha-

nio malè hac in parte disputatum. Bellarminus ita : *Dicit Epiphanius Paulum solum scribere : Episcopis & Diaconis, quod eo tempore ob ministrorum penuriam multis in locis non essent presbyteri ulli, sed Episcopi soli cum diaconis. Possunt enim episcopi etiam presbyterorum officio fungi. At hac Epiphaniij explicatio tum haberet locum, si Paulus scriberet : Episcopo (in singulari) & diaconis, aut si non ad unam sed ad plures civitates scriberet & Episcopis (in plurali) & diaconis. Sed cum ipse ad unam urbem Philippensium scribas & dicat se scribere ad Episcopos (in plurali) & diaconos, quomodo quæso illa explicatio locum habere potest? Si enim in una urbe multi episcopi esse poterant, quanto facilius unus episcopus & plures presbyteri. Hæc contra Epiphanium Bellarminus d. l.*

XII. Unum adhuc ex Epiphaniij discursu circa testimonia S. literarum quoad præsens expendi dignum est. Magnum contra Aetium in dicto Paulino præsidium collocat, quum Timotheus episcopus jubetur, ut Presbyteros ne objurget, sed humaniter tractet. Episcopo igitur in presbyterum erat potestas. Resp. falsò præsupponit Epiphanius, Titum & Timotheum horumque similes veros episcopos, quales Epiphaniij tempore erant, fuisse. Non episcopi erant & ad certam cathedram restricti, sed Viri Apostolici, quorum opera in fundandis hinc inde Ecclesiis Apostoli utebantur. Hinc & Apostoli (quia horum *ovregoi* erant) & Episcopi (quod in novellis ecclesiis presbyteros constituerent) vocabantur ob aliquam analogiam, si non prorsus homonymicè. Sic Paulus Epaphroditum Apostolum nominat, quod ad Philippenses eum misisset. Phil. II, 25. Sed quales Apostoli, tales quoque Episcopi erant, saltem ob quandam similitudinem. Adde quod jam supra ex Epistolis ad Timotheum & Titum æqualitas Episcoporum & Presbyterorum ævi apostolici evicta sit. Ita ergo

ergò in hæresi ex SS. literis Aerio impingenda malè hætenus sterit Epiphanius.

XIII. Sed & ex antiquis Patribus opido multi, imprimis S. Hieronymus hanc indifferentiam Episcoporum & presbyterorum tantum abest, ut Aerianam hæresin statuerint, ut potius S. Scripturæ conformem duxerint: Neque enim nostra sententia alia est, quam S. Hieronymi dicentis: *IDEM EST PRESBYTER, QUI ET EPISCOPVS & antequam diaboli instinctu studia in Religione fierent & diceretur in populis: Ego sum Pauli, ego sum Apollo, ego Cepha, COMMVNI PRESBYTERORVM CONSIGLIO Ecclesia gubernabatur. Postquam vero unusquisque eos, quos baptizaverat, suos putabat esse, non Christi, in toto Orbe decretum est, ut unus de presbyteris electus superponeretur ceteris, ad quem omnis Ecclesia cura pertineret, & schismaticum semina tollerentur. Puteo autem aliquis, non scripturarum, sed nostram esse sententiam, quod EPISCOPVS AC PRESBYTER VNVS, & aliud ætatis, aliud officij nomen sit, relegat Apostoli verba &c.* Pluribus enim Scripturæ oraculis suam hanc doctrinam egregiè confirmat, Comment. in Epist. Tit. 1, 5. His paria docent S. Ambrosius, S. Augustinus, S. Primasius, alij, quorum testimonia affatim reperire est in Walonis Messalini, quisquis ille sit, libello ex professo in hanc rem scripto. Proinde si hæc sit Aerij hæresis jure divino nihil discriminis inter episcopum & presbyterum intercedere, tot sanctissimos Patres hæreticos fuisse oportet.

XIV. Michaellem Medinam quidem lib. 1. de sacrorum hominum Origine & Continentia affirmare non puduit, ipsum S. Hieronymum idem cum Aerianis sensisse Ambrosium quoque Augustinum, Sedulium, Primasium, Chrysostomum, Theodoretum, Oecumenium, Theophylactum in eadem cum Aerio hæresi fuisse. *In Hieronymo*

tamen, inquit, & gratia illis Patribus olim propter eorum honorem & reverentiam hæc sententia aut dissimulata aut tolerata est in illis; contra in hæreticis, quum in multis quoque aliis ab Ecclesia declinarent, tanquam hæretica semper est damnata. Quanta est hujus scriptoris impudentia, ut ad tuendum, quod animo præconceperat, dogma tot Patres totius Ecclesiæ suffragio receptos hæreseos accusare non dubitet. Quid nobis nõ affingant ejuscemodi ingenia, quæ nec ipsis Ecclesiæ Patribus inter hæreticos referendis parcunt? Pro confesso interea accipimus, quod Medina veritatis fulgore percussus nostram de Episcopis & Presbyteris sententiam in scriptis tantorum Patrum fundari agnoscat. Bellarminus ubi hanc Medinæ sententiam recenset, quæ præcipui Patres nobis ὁμόψυχοι Acriani statuuntur, valde inconsideratam eam vocat (siquidem levissimè loqui velit) ideo, quod (1) tot clarissimis Patribus, quos hæreticis connumerat, (2) Ecclesiæ, cui acceptionem personarum impingit, (3) communi causæ catholicorum injuriam faciat: Quæ enim fronte (rectè scribit) SS. Patres contra hæreticos (Protestantes) adferemus, si eam sententiam ab Ecclesia damnatam dixerimus, quam omnes ferè Patres græci & latini docuerunt? l. i. de Cleric. c. xv. Sed dum supra laudatos Patres ab hæresi Acriana Bellarminus absolvit, eadem opera nos, qui cum Patribus consentimus, ab hæresi immunes pronunciat.

XV. Pontificij interea ut suum dogma (quod est, majorem ordinem Episcoporum, minorem presbyterij jure divino esse) contra nos tueantur, & S. Hieronymum ceterosque Patres nobis consentientes ab hæresi Acriana, quam nobis impactam volunt, liberent, mirè se torquent. S. Hieronymus, ait Bellarminus l. c. ubique agnoscit episcopum esse majorem presbytero, quantum ad ordinis potestatem & hoc sine dubio jure divino, ut patet ex epist. ad Evagrium, ubi
sic

*sic ait: Quid facis, excepta ordinatione episcopus, quod non faciat etiam presbyter? Sed Acrius docuit, unum esse Ordinem, unum gradum & manus presbyterum æquè ac episcopum imponere: Hæc enim ipsissima Acrii verba sunt. Resp. nullibi ex S. Hieronymo id, quod ubique extare Belarminus mentitur, probari posse, puta quod *ævo apostolico* (de eo enim controversitur) ordinis discrimen inter Episcopos & Presbyteros statuerit. Quod ad dictum prolatum attinet, *ἀνεγδοκίον* id est, quia Vir S. ibidem non de cō loquitur, quid sub apostolis, sed quid suo tempore (qui tribus seculis erat apostolis junior) fuerit in usu. Tum vero ordinum SS. discrimen fuisse nemo negat. Evidenter id ex contextu patet: Verba enim hæc sunt: *Quod autem POSTEA* (nempe post Apostolorum tempora) *unus electus est, qui cæteris præponeretur in schismatis remedium factum est, ne unusquisque trahens ad se Ecclesiam Christi rumperet: nam & Alexandria à Marco Evangelista usque ad Heraclam & Dionysium episcopos presbyteri semper unum ex se electum in excelsiori gradu locatum episcopum nominarunt, quomodo si exercitus Imperatorem faciat aut diaconi eligant de se, quem industrium noverrunt & archidiaconum vident: Quid enim excepta ordinatione facit episcopus, quod presbyter non faciat?* Ostendit videlicet Episcopis sui ævi Hieronymus presbyter, non habere eos, quod adversus presbyteros superbiaut vel imperiosius agant, cum non competat ipsis, nisi primitas ordinis & potestas ordinandi, quæ sub Apostolis erat toti presbyterio communis, *postea* in primarium presbyterum, in quo uno temporis successu nomen episcopi hæsit, collata est. Epiphanius contra Acrium id ita exprimit: *Episcoporum ordo Patrum generator est: Patres enim generat Ecclesia. Presbyterorum verò non potens generare Patres per lavacri regenerationem generat filius Ecclesia.* At nec Acrio alia sententia stetit:*

tit: nam quod docuit unum esse ordinem unumque gradum Episcopi & presbyteri, id verum est de *ævo apostolico*, ad quod Acrius æquè ac Hieronymus provocat; nec adeo hospes in Ecclesia potuit esse Acrius presbyter, quin Sacrorum Ordinum discrimen sua ætate receptum nosset.

XVI. Dixit quidem Acrius: *Manus imponit Episcopus, imponit & presbyter*. Sed hinc malè colligitur ab Acrio presbyteris sui ævi ordinationes tribui: neque enim omnis impositio manuum in Veteri Ecclesia collati ordinis erat indicium, nisi ea, quam *χειρουργία* prisca appellarunt. At Acrius presbyteris *χειρουργία*, ut sonant verba græca apud Epiphanium, tribuit, non *χειρουργία*. Sic enim docuisse fertur: *χειρουργεῖν ὁ ἐπίσκοπος, ἀλλὰ καὶ ὁ πρεσβύτερος*, non ad ordinationem, sed ad benedictionem. Notati h. l. meretur, quod ἡ *χειρουργία* apud veteres multiplex fuerit nec omnis presbyterio adempta. Pœnitentia enim h. e. pœnitentiæ agendæ venia cum manuum impositione dabatur. At pœnitentiarius, qui eam dabat presbyter fuit in Ecclesia Orientali. Hic etiam cum manuum impositione reconciliabat Pœnitentes exacto per scriptæ exomologeseos tempore. In Ecclesia Africana solius erat Episcopi reconciliare Pœnitentes. In Ægypto absente episcopo Presbyter consignabat, quæ confirmatio etiam cum manuum impositione dabatur. Notanter itaque dixit Acrius *χειρουργεῖν ἐπίσκοπος, ὁμοίως καὶ ὁ πρεσβύτερος*, de generali impositione manuum loquens, non de illa speciali, quæ ordinationibus competit, dicta *χειρουργία*, uti præclare observat contra Petavium Loyolitam Walo Messalinus in l. de Episc. & Presb. c. iv. Hactenus igitur Acrius & S. Hieronymus consentiunt in eo (1) quod *ævo apostolico* Episcopus & presbyter per omnia pares fuerint (2) quod ea ætate, qua ipsi vixerunt, solo ordinandi jure episcopus presbytero superior fuerit.

fuerit. De primatu Jurisdictionis, quam Pontificij fingunt, alium in V. E. silentium est.

XVII. Sed operæ pretium est tandem ostendere, quid discriminis sit inter sententiam Aerij, ob quam Ecclesiæ odium incidit, & S. Hieronymi multorumque Patrum, quibus eadem nobiscum saltem in præsentī materia mens est. Differunt igitur (1) quod Acrius veterem morem, qui apostolico ævo fuerat, revocandum & presbyteros episcopis æquales iterum faciendos statuerit. At S. Hieronymus mores sui sæculi post apostolorum excessum salubriter inductos diversosque à presbyteris episcopos utiliter ab Ecclesiā factos, nec ab hoc Ecclesiæ instituto licet Apostolis ignoro recedendum censuit. (2) Acrius presbyter Episcopi sui jugum excutere volens ob disparitatem Episcopi & Presbyteri ab Ecclesiā divortium fecit, turbas dedit & schisma excitavit: at S. Hieronymus itidem presbyter, tantum abest, ut propterea ab Ecclesiā secesserit, ut potius superioritatem Episcoporum agnoverit, commendaverit eamque bono consilio vel ut ipse loquitur, IN SCHISMATIS REMEDIUM constitutam docuerit. Igitur quod hic Schismatis remedium vocat, ille in materiam schismatis convertit (3) Acrius contendit graviter peccasse Ecclesiā, quæ Episcopos supra presbyteros evexerit. *Dicebat* (scribit S. Augustinus hæc. LIII.) *Presbyterum ab Episcopo nulla differentia DEBERE discerni.* Damnavit igitur Ecclesiā ob inductum SS. Ordinum discrimen, ob quod S. Hieronymus Ecclesiā dilaudat. Nos verò in talibus Aerium publicum Ecclesiæ turbatorem non tueri manifestum est.

XIX. Dicis: Sed nec apud Protestantē discrimen Episcoporum & Presbyterorum reperire est adeoque in hoc saltem cum Acrio ejusque conventiculis Ecclesiā Pro-

testantium concordat. Resp. sicut disparitas illa fatenti-
 bus S. Hieronymo aliisque Patribus non est juris divini,
 sed humani, ecclesiastici, positivi: ita etiam in Ecclesiæ ar-
 bitrio fuit eandem retinere vel tollere: nam circa Leges
 merè ecclesiasticas & positivas Ecclesia non universalis tan-
 tum, sed & particularis, siurgens ratio intercesserit, dispen-
 sandi jus habet. Tantum verò abest, ut TEMERE, quem-
 admodum fecit Aerius, antiquum Ecclesiæ morem abro-
 gaverimus, ut necessitas potius (quæ major lege est) rede-
 undi ad primigeniam consuetudinem, quæ sub ipsis apo-
 stolis viguit, Ecclesijs nostris fuerit imposita inde, quod
 Episcopi in Papatu neminem sub initium Reformationis,
 imò nec hodie quenquam in nostra Ecclesia sive Presby-
 terum sive Episcopum ordinare voluerint. Ne igitur Ec-
 clesia Orthodoxorum presbyteris destitueretur, reddenda
 iisdem ordinandi potestas fuit, quam ævo apostolico ha-
 buerunt, at postea soli episcopi de manibus Ecclesiæ, li-
 berissimo instituto acceperunt; atque ita cum in V. E. solo
 ordinandi jure episcopus presbytero superior fuerit, co
 presbyteris reddito æqualitas denuo facta est. Verùm quia
 summa necessitas nos ut huc delaberemur coegit, malè
 cum Aerio compingimur, qui ex mera malitia & episco-
 porum Catholicorum odio ordines ecclesiasticos con-
 vulsit.

PRECES ET OBLATIONES PRO DEFUNCTIS.

XIX. Secunda, quam cum Aerio communem no-
 bis facit Bellarminus, Hæresis est, quod Aerius docuerit
 ORARE VEL OFFERRE PRO MORTUIS NON
 OPORTERE. At Preces pro Defunctis tales sunt, ob
 quas nemini *per se ac simpliciter loquendo* hærescos nota in-
 uri potest, cum de his in tota S. Canonica Scriptura, præ-
 fertim

ferim Novi Test. unde Christiana Fides vel maximè æstima-
 manda est, nec vola nec vestigium exeat: nam quod in
 Macc. xix Iudas pro occisis in bello preces & victimas ob-
 tulisse dicitur, tanti non est, ut fidei nostræ dogma con-
 stituat, cum liber extra canonem sit & auctorem habeat,
 cui sub libri finem venia erratorum petenda fuerit. At
 nos supra ostendimus nullum dogma *per se* hæresin esse, nisi
 cum S. Canonica Scriptura, inprimis cum Apostolica Do-
 ctina pugnet. De cætero in tribus ab Acrio quoad præ-
 sens, distinguimur. Primò Acrius non tam ideo, quod pro
 mortuis orare vel offerre noluerit, sed quod fideles pro
 defunctis orantes damnaverit precesque istas cum æternæ
 salutis dispendio conjunctas statuerit, pro hæretico habitus
 est: *Docuit enim, teste Augustino hæc, LIII. NON OPORTET
 RE orare vel offerre pro mortuis.* Ea verò doctrina si hæreti-
 ca fuerit, simili ratione Pontificij in censum hæreticorum
 veniunt, qui levem quemcunque à Tridentinis in doctrina
 dissensum anathemate feriunt. At in tali hæresi Protestan-
 tes non sunt, ut ob preces pro defunctis Veterem Ecclesiam
 ejusque sanctissimos Patres damnent, quin potius cum S.
 Augustino fateamur, *quod non parva sit universa Ecclesia, quæ
 in hac consuetudine claret, autoritas, ubi in precibus Sacerdotis,
 quæ Domino ad altare funduntur, locum suum etiam habet com-
 mendario defunctorum.* ex Lib de cura pro mortuis cap. i. Nos,
 protestatur Apologia Aug. Conf. *orationes pro mortuis non
 prohibemus nec Acrio patrocinaur.* Art. III. abusuum muta-
 torum.

XX. Alterum, in quo circa Preces pro defunctis ab
 Acrio distinguimur, est illa vox Acrij: *Oras vivus, quid hoc
 mortuo prodest?* Sed nec hæc doctrina nostra est, cujus rei
 fidem l. cit. Apologia facit cujus integra verba hæc sunt:
*Falso citant adversarij contra nos damnationem Acrij, quem
 dicunt*

dicunt propterea damnatum esse, quod negaverit in Missa oblationem fieri pro vivis, & mortuis — Epiphanius testatur Aerium sensisse, quod preces pro mortuis sint inutiles. Id reprehendit, neque nos Aerium tuemur. Nos tacente S. Scriptura definire non audemus, quis præcise sit usus precum pro defunctis, eo tamen ipso cum Aerio nondum inutiles, nedum illicitas pronunciamus. Nec sequitur: Non valent preces pro defunctis ad animas è purgatorio, commentitio illo furno liberandas, quemadmodum Pontificij volunt. Ergo nullus ipsarum usus est. Fallacia enim est à dicto secundum quid. Multi è nostris ad mitigandum discussionis iudicium; alij pie defunctis in Beatitudinis suæ inchoatæ augmentum prodesse preces istas conjiciunt. Laudem certè vel hoc uno (cæteris paribus) merentur, quod mutuz inter vivos & defunctos Charitatis symbola existant.

XXI. Sanè Epiphanius in refutatione Aerij utilitates precum pro defunctis percerere volens eas inprimis commemorat, quæ vivos attinent: *De eo, inquit, quod feruntur nomina defunctorum visa, quid hoc magis utile fuerit, quid commodius & magis oratione dignum, quod credunt praesentes, quod hi, qui decesserunt, vivunt & non sunt nulli, sed sunt & vivunt apud Dominum & ut pientissimam predicationem recenseam, quod spes est orantibus pro fratribus, qui in peregrinatione, (Purgatorii ne verbulo quidem meminit) versantur. Pro sunt autem & Preces pro ipsis factæ, etsi TOTAM CVLPAM non abscindant.* Hæc Epiphanius hæc, LXXV. Vivis igitur potius, quam defunctis preces exsequiales conducere affirmat & apud illos insignie fidei augmentum de animabus in Dei manu residuis & subsequutura Resurrectione corporum, nec non firmamentum fuisse affirmat bonæ spei, fore aliquando, ut ad fratres in Domino defunctos & à carne peregrinantes (non à Domino) redeant & ex voto denuo
co n-

conjungantur. Quoad mortuos, in genere dicit prodesse preces, et usum non determinat. Obscurius est, quod ait, preces pro defunctis prodesse, *sed totam culpam non abscindere*. Inde enim Pontificij inferunt, precibus istis aliquid saltem culpæ v.g. culpas veniales, aut mortales satisfactionibus canonicis nondum plenè dilutas aboleri. Sed videtur Epiphanius Aerio respondere voluisse, qui ab ecclesia doceri fingeat, quasi preces etiam in impænitentia defunctis ad peccatorum quorumvis veniam obtinendam prodesse, ut paulo inferius dicitur. Epiphanius igitur, qui in tota hac materia trepide versatur, affirmat alia ratione preces pro defunctis prodesse posse, etsi non dicamus τὰ ὅλα τῶν αἰπαμάτων tota peccata h.e. omnia in universum peccata, mortalia sive venialia per eas abscindi. An verò τὸ μέρος τῶν αἰπαμάτων, pars aliqua peccatorum vel nonnulla saltem peccata vivorum illis suffragijs aboleantur, Epiphanius non exprimit, sed pontificij de suo, ut solent, addunt. Legi ad hunc locum dignus est Chemnitius in Exam. Concil. Trid. de Probationibus Purgatorii Cap. de Precibus pro defunctis.

XXII. Paulo specialius usum illarum precum manifestat Cyprius Doctor, dum porro contra Aerium scribit: *Pro justis & peccatoribus memoriam facimus. Pro peccatoribus quidem misericordiam implorantes; pro justis verò & Patribus, patriarchis, prophetis, apostolis, evangelistis, martyritus, confessoribus episcopis & anachoretis & pro universo ordine celestis hierarchia, ut D. N. Iesum Christum ab hominum ordine separemus, per honorem, quem ipsi exhibemus & ut adorationem ipsi præbemus, illud cogitantes, quod Dominus non est alicui hominis adequatus, etsi milles & ultra in iustitia degat. Ille enim Deus est, hic homo.* Hæc iterum Epiphanius. Dum precibus apud Deum defuncto pænitenti misericordiam obtineri

posse Sapiens Antiquitas credidit, inde perperam colligitur, animas in Domino mortuorum in purgatorio aliove misero statu degere, unde per preces liberandi sint, sed idem fuit votum Antiquitatis cum Paulino isto: *Des Dominus Onesiphoro, ut misericordiam inveniat in illo die.* Unde patet, quod in extremo adhuc die locus aliquis misericordiae futurus sit. De cetero memorabilem in ordine viventium ex precibus pro defunctis usum Epiphanius annectit. Dum enim Ecclesia eadem prece, qua misericordium Domini defuncto optarunt, peccatores & iustos conjunxit nec aliquem Sanctorum eximium habuit, quin pro ejus salute oraverint, unico Salvatore excepto, fuit hæc oratio veluti publica, Fidei professio, neminem quantumlibet Sanctum ex proprijs meritis vel per suam justitiam salvari, sed omnes misericordiae divinae per Christum indigos salutem non habere, nisi per unum hominem in gratia lesu Christum ejusque justitiam, passionem & mortem, ut ex re & vero S. Augustinus dixerit: *Va etiam laudabili vita hominum, si remota misericordia eam discutias.* lib. ix Confess. c. 13. Verum de hoc precum illarum usu in Papatu vix quicquam dicitur.

XXIII. Tercium, quod circa Preces pro mortuis Aerius docuit, nec nobis probatur, est per preces istas latant portam flagitijs omnibus aperiri & peccandi licentiam introduci, qua de re ita loquentem Aerium facit Epiphanius: *Si preces viventium mortuis profint, nemo sit pius nec boni quicquam faciat, sed acquirat amicos quocunque modo aut per pecunias persuadens amicis vel in obitu id demandans, & orent pro ipso, ut ne quid illic patiat, neque immedicabilia peccata ab ipso perpetrata requirantur.* Sed nemini Pontestantium in mentem venit, ut assereret, tales fuisse ritus vel doctrinas Veteris Ecclesiae, quibus impietati fenestra patefieret, quin agno-

agnoscimus potius priscos Patres sanctimonia atque eruditione pares hodiè vix habere, quippe qui pientissimis institutis id intenderunt, ut pietas & devotio animis fidelium ingeneraretur. Nec profecto mos orandi in Vet. Eccl. receptus *per se* impios reddidit vel impietati faces accendit, cum ut supra dictum, hæ preces augmentum Fidei, nutrimentum Spei, Symbolum mutuae erga defunctum Charitatis fuerint, saltem ex Ecclesiæ scopo esse debuerint. Si qui è vulgo has preces aliter acceperint & indifferenter omnibus, etiam mortali peccato immortuis proficuas putarint, superstirio hæc fuit prudentioribus haud probata & precum istarum abusus. Alia verò ratio est, si quis hodiernas Papistarum preces & Missas pro defunctis spectet. Has qui pecuniæ aucupia & regni Antichristi columnas dixerit, fortassis à vero non recedit.

XXIV. Nos ubi ostenderimus Preces veterum pro defunctis ab ijs, quas hodiè Pontificij frequentant, toto quod dicitur cælo differre, simul evictum erit, nos, qui Pontificias preces taxamus, cum Aerio, qui veterum preces sugillabat, malè conferri. Antecedens facile probatur. Prisci in precibus suis sola defunctorum nomina ex diptychis h. e. tabulis ecclesiasticis recitabant iisque placidam & mollem requiem, requiem perfectam, refrigerium, locum lucis & pacis, misericordiam in decretorio illo die, gloriam auctiorem, Resurrectionem ad vitam & similia pio affectu comprecabantur. At Pontificij preces pro defunctis expiatorias faciunt easque suffragia statuunt, per & propter quæ Deus pænæ post culpam residuæ gratiam in altera vita faciat. Vocant satisfactorias iisque vim è Purgatorio liberandi asingunt, qua de re puriori Antiquitati, primis saltem iv seculis nihil omnino constitit. Interea Pontificij sibi caveant, ne in idem cum Aerianis stabulum

com-

compingi possint. Aerius enim preces omnes pro defunctis adeoque illas præ cæteris damnavit, quibus Ecclesiæ pro Patriarchis, Prophetis, Apostolis, Martyribus oravit. Nam adversus has preces ratio ab Aerio producta in primis valet: *Orat aut dispensationem facit* (eucharistiam celebrat) *vivus, quid mortuo id prodest?* Sed si unus precum pro defunctis usus sit, quem Pontificij volunt, ut animæ purgatorio eximantur, oportet, ut cum Aerio veteri hæretico confiteantur, preces illas saltem, quas pro enumeratis sanctis in cælo indubiè existentibus Ecclesiæ fudit, inutiles & reprobas esse: in confesso enim apud omnes est, animas Patriarcharum, Prophetarum, Apostolorum, Martyrum in Purgatorio nunquam fuisse; vel si alium istarum precum fructum statuunt, iterum fatentes habemus reos, ex precibus pro defunctis probari ignem purgatorium non posse. Vtrum velint, eligant.

XXV. Dicis: ad eum modum ipse S. Augustinus, qui Aerium in hæreticorum syllabo ponit, Aerianis favere dicendus est, dum preces pro sanctis in cælo reprobat: Hæc enim ejus verba sunt: *Habet ecclesiastica disciplina* (puta in partibus illis Africæ, Hippone & in vicinia) *quum martyres ad altare Dei recitantur, ut pro ipsi non oretur. INIURIA enim EST ORARE PRO MARTYRE, cuius orationibus nos commendari debemus.* Serm. xvii. de Verbis Apostoli. At constat ex Veterum Liturgijs, (quæ licet nec Apostolos nec Viros apostolicos autores habeant, valde tamen antiquæ sunt & apud Pontificios in precio) morem in Oriente præsertim fuisse pro quibusvis etiam maxime sanctis orandi, ut ex formulis precum Tomo vi. Bibl. PP. collectis videre est. Ipse canon Romanus OMNIBUS In Christo quiescentibus refrigerij locum apprecatur. Resp. dum S. Augustinus preces Orientalium pro martyribus reprobatur,

probat, Aerio certè in hac causa propior est, quam Ecclesiz, in qua preces pro martyribus erant receptæ. Paulo durius à S. Augustino dictum pontificij ipsi vix diffitebuntur: *Injuria est orare pro martyre*. Ecquis enim adeo rigidus veterum censor velit esse, ut ob preces pio animo pro martyribus fusas contra tot nobiles & ab ipsis Apostolis extructas Ecclesias actionem injuriarum instituat? Veritus S. Augustinus est, ne per preces istas Sanctorum dignitas quæ inter homines fulgere debebant, evilesceret, eorumque gloriæ in terris aliquid decederet si nos ipsos faceremus intercessores illorum, qui rectius nostri intercessores essent. At Christiani per Orientem absque injuriæ nota pro martyribus orarunt, cum nihil aliud nisi requiem vel acceptæ quietis continuitatem piissimo affectu (qui facit, ut nihil hinc sit injuriæ) martyribus apprecarentur. Sententiam tamen illam S. Augustini Aerianæ ex aliqua parte propinquam esse evidens est. Igitur antequam hæresin Aerij preces pro quibuslibet defunctis habitas damnantis, Ecclesiæ nostræ pontificij impingant, viderint, qua ratione S. Augustinum & se ipsos ab hac hæresi tueri velint, dum una cum Aerio preces pro Sanctis in cælo tanquam injurias vel inutiles ab Ecclesia eliminant.

XXVI. Vanissimum porro commentum est preces omnes, qualescunque tandem fuerint pro defunctis à nobis Aerium secutis explodi. Retinemus illas, sed abusibus, quos Papatus ijs invexit, sequestratis. Hinc si qui proximè præteritis diebus in Domino decesserint, gratias Deo agimus, qui in extremo agone moribundum adjuvit, & mortuo precamur, ut ejus molliter ossa cubent & in die Iudicij ad vitam resurgant. Id verò docemus, preces istas auctoritate S. Literarum destitui & solius Ecclesiæ consuetudine suffulciri. Consentit nobiscum Epiphanius, qui

in defectu S. Scripturæ ad auctoritatem Ecclesiæ se recipit:
Ut rursus, ait, ad propositi argumenti consequentiam deveniam,
quod Ecclesia necessario hoc perficit, traditione à Patribus acce-
pta. Quis autem poterit statutum patris aut matris dissolvere?
velut Salomo dicit: Audi fili sermones Patris tui & ne repudies
statuta matris tue, ostendens per hoc, quod & in scriptis & sine
scriptis docuit Deus Pater, Unigenitus & Spiritus S. Mater autem
nostra Ecclesia habet statuta indissolubilia, qua dissolvi non pos-
sunt. Cum itaque ordinata sint Ecclesiæ statuta & bene se ha-
beant & mirabiliter omnia fiant, confutatus est rursus hic se-
ductor, Acrius. Ita Epiphanius, qui ut vides, Preces pro
defunctis ἐν τοῖς πνευματικαῖς fundat. In reverentiam
tamen Veteris Ecclesiæ, quæ morem illum prima indu-
xit, preces istas liberas esse volumus. Nemo nostrum cum
Aerio, orantes pro defunctis damnet, modo in formulis
& terminis antiquæ Ecclesiæ hi, qui orant, sese contine-
ant. Nemo preces pro defunctis sub necessitate salutis
exigat vel orate nolentes pro mortuis (quod in SS. Literis
nihil ea de re extet) damnatis ab Ecclesiâ hæreticis connu-
meret. Inter hæc extrema si mediam teneremus viam,
iniri Concordia facile posset.

XXVII. Orationi pro defunctis Oblationes Bellarminus connectit. *Acrius, inquit, dicente Augustino do-*
cuit orare vel offerre pro mortuis non oportere. At nec Pro-
testantes ullibi locorum pro defunctis obferunt. Igitur
hac saltem in parte Aerium sequuntur. Sed nos iterum
annotamus Aerij hæresin non fuisse, quod non obtulerit
pro mortuis vel quod oblationes istas ἐν τοῖς μέντοι statu-
erit, sed quod dixerit, NON OPORTERE (hæc enim S.
Augustini verba sunt) obferre pro mortuis, nec salvari
posse eos, qui ita offerunt. At nos veterem Ecclesiâ pro
mortuis obferentem absit, ut condemnemus. Dein Ae-
rius

rius ob rem hanc indifferentem *perrinaciter* ab Ecclesia dissensit & schisma formavit. Solenne autem est S. Augustino, schismaticis hæreseos notam impingere, si forte errori suo perrinaciam adjungant. Sic de Donatistis scribit, *quod post dictam & finitam cum Ceciliano causam rei falsitatis deprehensi PERTINACI DISSENSIONE FIRMATI schisma in hæresin converterint.* Similiter Aerius circa oblationes pro defunctis hæreticus dictus est 1. quod dissidentes damnaret 2. quod errori perrinaciam adjungeret & in schismate contumax perseveraret. Sed uti oblationes veterum in Ecclesia hodie cessant, etiam inter Pontificios, sic propter eas schisma formatum dici non potest.

XXIX. Notabile porro est, quod S. Augustinus inter propria Aerij dogmata preces cum oblationibus conjungat. Ita enim scribit; Dixit Aerius, Orare VEL offerre pro mortuis non oportere, ut videas per oblationes nihil aliud, quam preces pro defunctis intelligi. At Pontificij dictum hoc de Incruento suo Missæ Sacrificio accipiunt. Epiphanius, qui in Acrio refutando copiosior est, Oblationum non meminit, sed hoc ejus dogma refert; *Cur post mortem nomina mortuorum recitatis?* Sed esto, quod Aerius veterum pro defunctis oblationes contemserit, id nobis objici non debuit, qui in Papistarum Missam pro defunctis invehimur. Si Acrio in hac causa succineremus, oportebat in Papatu oblationes Veteris Ecclesiæ, quas Aerius damnasse fertur, adhuc reperiri. Sed has dudum desisse ex sola veterum obferendi rituum enarratione palam fiet. In Vet. Ecclesia moris erat, ut si quis ante expletam Pœnitentiam obiisset, cognati & amici nomine defuncti munera, panem præferrim & vinum ad dominicum altare obferrent, quæ oblata si reciperentur, indicio id erat defunctum in Ecclesiæ communione obiisse dignum.

que habitum, cuius nomen è diptychis ad Missam recitaretur, & pro quo preces funderentur. *Ha oblationes*, scribit S. Augustinus, *pro valde bonis, gratiarum actiones; pro non valde malis, propitiations; pro valde malis, nisi nulla sint adjumenta mortuorum, qualescunque vivorum consolationes sunt.* In Enchir. ad Laur. c. cx. Ex his pro defuncto h. e. nomine defuncti ad altare oblati S. Eucharistia confici solebat, unde omnes, qui exequiasiverant, communicabant, ut ostenderent, se cum defuncto adhuc fide & spiritu communicare, atque hæc Missa circa curatum funus habita *Missæ pro defunctis* vocabatur nō ideo quod defuncto in altera vita prodesset crederetur, ut Pontificij somniant, sed quod eam validū incentivum crederent ad ardentius orandū pro defuncto, quemadmodum hæc singula ex Antiqq. Eccl. præclare deduxit B. Calixtus in Disp. de Sacrif. Christi Th. 25. & seqq. Cum igitur vel *avmilia* Papalium Sacrorum probet oblationes tales non amplius superesse, patet nos, qui in Papalia Sacra invehimur, cum Acrianis veteres oblationes improbantibus æquandos non esse.

XXIX. Verum hæc est Pontificiorum vafrities, quæ glaucoma imperito vulgo obijciunt. Nomina Veteris Ecclesiæ ostentant, *Missæ Oblationum* & similia, sed quoad dogmata & res nominibus illis olim significatas ab institutis vel semitis antiquis longissimè recesserunt. *At nomina sine rebus quid sunt, nisi sonora mendacia?* quid, nisi cassæ nuces? Ita hoc loco quod Acrio circa rejectas oblationes pro defunctis impropèrat, Pontificij in nostram Ecclesiam, quæ papisticas pro defunctis Missas (*Seelmesse*) sustulit, intorquent, quasi verò oblationes veterum & Missæ in Papatu, in quibus Deo Patri Filius per Sacerdotem modo incruento offerri & meritum Christi omnibus, quibuscunque Missifex voluerit, vivis & defun-

dis

Quis in primis è purgatorio liberandis applicari fingitur, per omnia concordent, cum theatricas illas nugas nemo veterum noverit, nedum probarit aut reprehenderit. Aliàs si per oblationes pro defunctis eleemosynas & ad pias causas legata intelligi quis velit, quibus post deductum funus vel ex defuncti testamento vel ex arbitrio hæredum pauperes vel clerici olim donari solebant, in illis approbandis difficiles non sumus nec ejusmodi opera pieratis cum Aerio improbamus. Hinc in multis apud nos ecclesijs videas in divitum funeribus eleemosynas liberali manu dispesci. Sunt alij è Nostratibus, qui ut post obitum benè agere ne cessent, annua legata pauperumque stipendia suo nomine distribui faciunt eorumque in cælis, virtute meritorum Domini, remunerationem expectant. Hæc apud nos fiunt, commendantur & ad veteres oblationes propius, quam Missæ pontificiæ accedunt.

STATA JEJUNIA.

XXX. Tertia, quam cum Aerio communem nobis faciunt, Hæresis stata jejunia concernit. Ita enim Bellarminus l. iv. de Notis Ecclesiæ c. 9. *Aeriani, inquit, resse Augustino docuerunt, stata solenniter jejunia celebranda non esse, ne videantur esse sub lege. Epiphanius addit, eos è contrario consuevisse feria Sexta & in Quadragesima ac præcipuè in Magna hebdomade vesci carnibus & si quando jejunare volebant, die potius dominico, quam alio jejunare solitos. Eadem docens & faciunt Lutherani ferè omnes. Quis existimet tam splendide mentiri S. R. E. Cardinalem potuisse? Audiatur solum Epiphanius, qui de Aerio sic scribit: Sed nec jejunium juxta Aerium ordinatum est. Hæc enim judaica sunt & sub jugo serviunt. Insuper enim lex non est posita, sed parricidii & matricidii & reliquis. Si verò omnino volo jejunare, qualemcunque*

eligam diem à me ipso & jejunabo propter libertatem. Unde
apud ipsos studium est, ut porias die dominico jejunent; quarta
vero & pro sabbato (quibus veteres Christiani olim jejuna-
runt) edant. Sæpe verò etiam Quarta (die Mercurij) jeju-
nant non ex statuto, sed ex propria ut inquit, voluntate. In
diebus autem Pascha quando apud nos (NB. morem antiquum)
fiunt humisdormitiones, castitates, afflictiones, siccorum esus
(xerophagiz) preces, vigilia & jejunia & omnes animarum
salutes per sacras afflictiones, ipsi à summo mane obsonantur car-
neque ac vino venas suas explent & cachinnantur ridentes ac
subsannantes eos, qui hunc magna hebdomadis cultum perficiunt.
Tamen si enim Aeriani renunciatorium habent vita moaum (hac
in parte Religiosis ita dictis in Papatu perquam similes
fuerunt) non tamen exercetur apud ipsos, sed multo plus carnis
esus & vini potus, nisi fortasse rari aliqui in medio ipsorum & pro-
pria voluntate hoc velint, verum plerique ipsorum magis utuntur
largis edulitiis, carnis esu & vini potu ut sæpe dixi. Hac sunt, qua
Aerius in mundo evomuit. Hætenus Epiphanius.

XXXI. Jejunium per se nemo nostratum, imò nec
Aerianus aliquis culpaverit. Protestantium sententiam
A. C. ita exprimit: *NON DAMNATUR IPSA
JEIUNIA, sed traditiones, qua certos dies, certos cibos præferi-
bunt cum periculo conscientie, tanquam istiusmodi opera sint ne-
cessarius cultus.* At nec ideo à veteribus reprehensus est
Aerius, quod Jejunium quoad ipsam substantiam rejecer-
rit, sed quod aliquas Jejunij veterum circumstantias fue-
rit cavillatus. Faretur enim Epiphanius, quod Aeriani
diebus dominicis & sæpe Feria Quarta jejuna-verint. De
eo igitur, an sit jejunandum, nihil fuit cum Aerio contro-
versæ. Id in quæstione erat, an stata jejunijs tempora
dicanda sint? Negativam Aerius sub specioso prætextu
defendit, quod de tempore jejunii nulla lex in N. T. à Chri-

sto vel ab Apostolis lata sit; Christiani autem novis legibus onerandi non sint, cum à legis & legalium ceremoniarum iugo per Christum redempti simus. Et ex parte iracundæ, quemadmodum dixit Acrius : In toto N. T. certa jejuniis tempora dicta non sunt. Quid ? nec ipsum jejunium ullibi in N. T. præceptum est, vel si viri sunt Pontificij producant. Legimus quidem jejunia in N. T. verbo & exemplo sæpius suaderi vel commendari v. g. cum Salvator ipse xl. dies totidemque noctes in eremo jejunavit; cum docuit, certum genus dæmoniorum non ejici, nisi per preces & jejunia Matth. xvii, 21 cum Apostolus Conjuges ab abstinendum exhortatur, ad tempus, ut vacare jejunio precibusque possint 1 Cor. vii, 5, & sic alibi, sed hæc mandantis verba non sunt. Hinc si quis rectè credat & pie vivat, erit tota vita non jejunet, salvandorum numero propterea non excidet. Liberalius de Jejunij præcepto S. Augustinus locutus videtur, cum ad Casulanum epist. 36 scribit : *Ego in Evangelicis & apostolicis literis totoque, quod appellatur, Testamento animo id revolvens, præceptum video jejunium (commendatum dicere voluit, certè debuit augustissimus Pater) Quibus autem diebus oporteat jejunare & quibus non oporteat, præcepto Domini & Apostolorum non invento definitum.* In eo igitur non cum Acrio, sed cum S. Augustino, qui Aerium hæreticis accenset, nobis convenit, quod contra Novatores in Papatu docemus, statos juniorum dies in N. T. nusquam esse divinitus traditos aut præscriptos.

XXXII. Malè Acrius audiit, quod Ecclesiæ potestatem indicendi certa jejunii tempora ademerit eamque ludaismi ob latas de jejuniis leges accusaverit. Sed meminisse debebat hic vitilipigator Ecclesiam jus ordinandi in ritibus externum Dei cultum, & quæ huc faciunt, admi-

micula

nicula de manu Domini & Apostolorum accepisse, ita ut circa adiaphora statuere pro arbitrio possit, modo ne ~~in~~ ⁱⁿ divinis sanctionibus præponantur vel adæquantur vel sub necessitate salutis urgeantur legesve de iis lata temere ferantur aut nimium multiplicentur. Alias inter divina & Ecclesiæ statuta ingens discrimen est: hæc enim ferre & auferre, condere & tollere in Ecclesiæ manu est, illa non item; quanquam nec ecclesiæ statuta absque causa maximè urgenti violanda sunt. Rem simili declarabimus: Hodie per totum Orbem Christianum divino cultui dies Solis dictus est, sed nullum ea de re mandatum in tota S. Scriptura exstat. Iam non licet inferre: Sacra ad diem Solis adstringenda non sunt, quia in SS. Literis id nullibi præcipitur, nec de diebus dominicis dicendum est, quod de statis jejuniis Acrius dixit: *Si sacra volueritis tractare, diem à me ipso quemlibet eligam & juxta libertatem meam sacris operabor.* Sane hujusmodi hominem, qui ita temere à communi Ecclesiæ statuto recederet & relicto die Solis Sacra publica in diem Veneris aut Saturni translata vellet, omnes insolentia, stultitia aut schismatis accusaremus, etsi ex se perinde sit, quocunque die cultus Deo debitus exsolvatur. Eadem de Aerio certos jejuniorum dies ægre ferente, ideoque schisma formante & Ecclesiam ~~et~~ ^{et} ~~nostram~~ ^{nostram} ~~adversam~~ ^{adversam} ~~et~~ ^{et} ~~damnantem~~ ^{damnantem}, nobis stat sententia. Firmiter statuimus nec olim Ecclesiam nec hodie Christianum magistratum peccare vel reos iudaismi esse, cum ex gravibus causis dies certos jejuniis dicant. In sanciendo enim jejuniorum diebus eadem Ecclesiæ potestas est, quæ in Sacris ad Solis diem de Sabbato transferendis. Impium itaque fuit & homine Christiano, nedum presbytero indignum, si Acrius illis diebus, quibus jejunium indixit ecclesiæ, ventri & gulæ in Ecclesiæ contemptum litaverit, quæ in re neminem Protestantium ad stipulatorem invenit.

XXXIII. Dicis: atque etiam Lutherani certos jejuniorum dies respuunt : Ita enim ex A. C. edocui sunt, quæ non quidem ipsa jejunia vult videri damnasse, *sed traditiones, quæ certos dies præscribunt.* Verum hæc denuo sententia nostratium perversio est, cum Praxis Ecclesiarum nostrarum contrarium doceat. Quis adeo hospes est in Ecclesijs nostris, quin meminerit in publicis sæpe calamitatibus certa jejuniorum tempora à Magistratu indicta? In his Provincijs statuta Iejunia Quatuor Temporum quotannis adhuc agimus. Nec nostrum *ἡμετέριον ἱεροδοξίας σύμβολον* Acrio favet: nam quod inde citant adversarij, eadem fide faciunt, quæ Satanas mutilatè S. Scripturam adversus Dominum allegans Matth. iv, 6. quod si liceat, facile quidvis cuivis impinges faciesque

Candida de nigris & nigra in candida vertes:

Neque enim simpliciter A. C. certos jejuniorum dies Acrium secuta damnat, sed illos demum, qui cum periculo conscientiarum tanquam necessarius cultus Ecclesiæ obtruduntur, quod quemadmodum non fecit Vetus Ecclesia, ita nec Acrius reprehendit.

XXXIV. Denuo h. l. fraus papistica detegenda est: Nā dum circa spreta Veteris Ecclesiæ jejunia Acrianis nos accensent, veluti concessum præsupponunt, sua jejunia cum jejunijs Vet. Eccl. convenire, quo nihil est falsius: Priscorum enim Iejunium erat ab omni cibo & potu & ab omnibus externis delitijs abstinentia per diem integrum usque ad vespertam. Vesperari cœnarunt quidem sed valde tenuiter eratque tale jejunium Pietatis & devotionis augendæ, in Precibus præsertim ardentius ad Deum fundendis adminiculum. Hinc S. Augustino jejunia & eleemosynæ *ala Precum* dicuntur, Sermon. lxx de Temp. prout hæc singula ex Rever. Antiquitate jam dudum deduxit Chemnitius in Exam.

E.

Concil.

Concil. Trid. de Ieiunio. Sed pontificium ieiunium in *car-*
nifrivio situm est h. e. in abstinencia ab esu carniū, de cæ-
tero piscibus ad saturitatem usque vesci & generoso vino
(liquido enim ieiunia frangi non credunt) venas implere li-
cet; & tū strenue ieiunant, cum à carnibus temperant,
erū alias difficilioris præparationis & maioris pretii escas
(sturiones, truttas, muranas) ad edendum conquirant, cu-
iusmodi ieiunia sam olim S. Augustinus tanquam luxuriæ
irritamenta rejecit. In serm. de Adventu Domini.

XXXV. Deincum olim luce sub occidua vel saltem
hora ix, quæ apud nos est (iii) pomeridiana, ieiunia solve-
rentur: Pontificij sumo meridie in quadragesima, hora a-
pud nos xii ieiunare desinunt, at vesperi variis electuariis,
placentis & bellariis sese reficiunt, ut proinde ne tempus
quidem apud veteres ieiunio prædefinitum observent. In-
dignum est, hypocritica illa ieiunia, quæ testis *sagina magi-*
steria dixeris, cum rigidis præscæ Ecclesiæ ieiuniis, quorum
vix umbram habent, conferri & nos qui in papisticos circa
ieiunia abusus invehimur, Aerianis sanctissima ieiunio-
rum Ver. Eccl. statuta sugillantibus pares censer. Id prorsus
intolerabile est & cum magna meritorum Domini inju-
ria conjunctum, quod his suis æquivoce dictis ieiuniis vim
merendi apud Deum & satisfaciendi pro peccatis tribuant,
ut videre est ex communi Papistarum responso ad Art. xv.
Aug. Conf. In Veteri Ecclesia licet rigida essent ieiunia, tan-
ta tamen eorum virtus credita non est. Rhetoricantur ali-
cubi præsci Oratores Sacri, & meritoria atque satisfactoria
ieiunia facere videntur, sed vel tyronibus in S. Antiquitate
constat, quo sensu voces *merendi & satisfaciendi* accipian-
tur. Nunquam fuit apud veteres ipse Dei cultus vel pars di-
vini cultus vel ratio Deum colendi in ieiunio posita, uti
aurumant pontificij, sed statuit Antiquitas ieiunia ad
Deū colendū *ministerialiter* prodesse, ut animus recte dispo-

neretur, caro subtrahito pabulo edomaretur, devotio in Pro-
 cibis accresceret &c. His positis evidens est, quod quantū
 papistica jejunia ab antiquis illis, tantum quoque nos ab
 Aerianis distemus. Iure optimo igitur Nostros iisdem ver-
 bis, quibus S. Leo M. Catholicos ab hæresi Manichæorum
 dehortatur, alloquimur: *Ne vos seducant deceptorii arribus fi-
 cta & simulata jejunia, quæ non ad purificationem, sed ad perditionem
 proficiunt animarum. Speciem quidem sibi pietatis & casti-
 tatis assument, sed hoc dolo actum suorum obscena circumtegunt
 & de profani cordis penetralibus jacula, quibus simplices vulneren-
 tur, emittunt, ut sicut ait Propheta sagittent in obscuro rectos cor-
 de. Magnum presidium est Fides integra, Fides vera, in qua nec
 augeri ab ullo quicquam nec minui potest (attendite Pontificiū,
 qui Fidei superadditis) quia nisi una est, fides non est, dicente
 Apostolo: Unus Dominus, una Fides, unum Baptisma &c. Serm.
 IV. in F. Nativitatis.*

XXXVI. Instas: Acrius ideo notatur, quod Feriæ Quar-
 tæ & Sextæ, & in primis Quadragesimæ Ieiunium solverit,
 Ita enim dum Aerium refutat, Epiphanius: *A quo non assensum
 est in omnibus Orbis terrarum regionibus, quod Quarta & Profab-
 bato Ieiunium decretum est in Ecclesia? Si verò oportet etiam con-
 stitutionem Apostolorū proferre, quomodo illic decreverunt Quar-
 ta & Profab-bato Ieiunium per omnia, excepta Pentecoste, & de sex
 diebus Pascha quomodo nihil omnino accipere precipiunt, nisi panē
 & aquam & salem, qualemq; diem agere & quomodo dimittere in
 illucescentem dominicam manifestum est. Quis autem magis de his
 novis hic ne seductor, qui etiam nunc superest, & huc usq; in mundo
 versatur, aut qui ante nos testes fuerunt, habentes ante nos tradi-
 tionem Ecclesiæ, quiq; etiam à Patribus suis traditum acceperunt.
 Atqui per totam quoque Protestantium Ecclesiam hæc je-
 junia cessant. Resp. (1) Aerium propter talia hæreticum cen-
 serti non potuisse, cum hæresis definiatur pertinax error. S.*
scri.

Scriptura evidenter oppositus. Sed de istis jejuniis diebus SS. literæ nihil præcipiunt, ut supra ostendimus. Schismaticus igitur esse potuit, dum unus ipse communem Ecclesiæ consuetudinem & Ecclesiam ipsam statis diebus jejunantem malitiose deleruit & priscis canonibus citra prægnantes causas ex mero odio episcoporum, quorum statutus subesse noluit, contumacem sese præbuit. Hæreticus certe propter omissa Ecclesiæ jejunia censeri nec potuit nec debuit, nisi fortasse (quod vero nobis sit simile) ob statuta jejunia Ecclesiæ condemnaverit: Iudaizare enim dixit Ecclesiam & populum Christianum Iudaico oneri denuo per hæc statuta subdi.

XXXVII. Dicimus (2) quod nec ab ipsis Pontificiis per statuta illa tempora ad morem veterum jejunetur, sed solum diversus à cæteris diebus edendi modus frequentetur, quia inter esculenta solum carnes non habent, quibus per cæteros dies absque ullo conscientie scrupulo vescuntur. Potui certe nihil detrahunt. Sed an hoc jejunare est, cum pro carnibus, à quibus abstinetur, grandia piscium duplicantur corpora, ut S. Bernh. alicubi loquatur. Dicimus (3) cum nec Quadragesimæ, nec Quartæ & Sextæ feriæ jejunia divinitus instituta sint, sed ex *solum Ecclesia* traditione deriventur, Ecclesiam quoque, etiam particularem, si sentita causa subsit, de his pro arbitrio citra hæreseos notam statuere posse. Dicis: Epiphanius jejunia IV & VI Feriæ ex *Apostolico canone* deducit. Idem reverentiam igitur Apostolorum retinenda erant. Resp. idem ille addit, *Pentecosten* ab Apostolis ordinatam h. e. ut quinquaginta dies continui, qui inter Festum Paschæ & Pentecosten intersunt, sint festi. Quæ autem potestas pontificiis fuit abrogandi Pentecosten, apostolicum illud & œcumenicum festum atque intra hoc tempus agendi jejunia, eadem fuit Protestantibus in jejniis Quartæ & Sextæ Feriæ tollendis, utur universaliter receptis, nec hæc ab Apostolis inventa constat, nisi ex sublestæ fidei scriptis. Possunt in jeju-

nia, quæ olim proba & recta erant, temporum successu tot tantique abusus irrepissse, ut pro præsentis rerum statuto lere illa satius sit, quam propter talia scrupulos iniicere conscientiis & nimia Legum Ecclesiasticarum multitudinem Christianos constringere, quemadmodum in ipsa quoque Rom. Ecclesia multi olim oecumenici Ritus hodie cessant.

XXXIIX. Quadragesimam ab Aerio violatam Bellarm. comminiscitur, ut habeat, in quo cum Aerio comparare nos possit. Apud Epiphanium, cujus fide hic nititur Bellarminus, mentio non est, nisi Magnæ Hebdomadis. Refert enim, quod Aeriani IN DIEBUS PASCHÆ (ita prisca septimanam Paschæ præviā vocarunt) heluati & comessati fuerint, quo tempore Orbis Christianus in luctu & jejuniis maximè rigidis (postea carenis dictis & inde die Karwoche) solo pane & aqua contenti vixerunt, humi cubarunt, ab uxoribus abstinerunt &c. Sed hic vitæ rigor in ipso Papatu per Quadragesimam cessat, adeoque non habent pontificii, quod hac in parte nobis improperent. Esu carnium in diebus Paschæ Aerianis objicit Epiphanius. *Philaster vero & hanc eum tribuit abstinentiam*, dicente S. Augustino, ut proinde incertum sit, annon carnis priviū apud Aerianos æquè ac Pontificios solenne fuerit. De cætero si nos cum Aerio Quadragesimam violare dicendi sumus, quod à carnium esu non abstineamus, in simili luto Pontificii hærebunt ideo, quod per Quadragesimam à vino non abstineant: Nam utrumque in Aerianis Epiphanius ex æquo reprehendit: *Aeriani, inquit, carne & vino per dies paschæ venas suas expleunt*. Aperta autem est calumniam, in Ecclesiis nostris Magnam Hebdomadam in comestationibus exigi. Quanta sit illius reverentia, quantus ad ædes sacras fidelium concursus, quam devota instituta S. Eucharistiæ, passionis & mortis dominicæ memoria, &c. pietatis exercitia, ipsa docet *avmψia*. Pluribus in locis die Parasceves

seces jejunari solet, per totam Quadragesimam historia Patientis Domini & Religiosa Vita sedulo inculcatur, organa aliaq; instrumenta musica in signum publici luctus conticefcunt, sponsalia nulla, nulla nuptialia convivio (ne quæ an-
sa heluationi præbeatur) aguntur, catechetica examina instituuntur ad morem Veteris Ecclesiæ, quæ Catechumenos olim per Quadragesimā in Fide Christiana instruxit, eosq; dixit Audientes. Dom. Palmarum Competentes fecit & Sab-
bato M. Electos, donec in F. Paschæ baptizarentur, qua de re alibi. Iudicet jam Orbis universus, an hoc sit favere Aerio per Magnam hebdomada epulanti & in Ecclesiæ contentū sacratissimis illis diebus intemperantiæ fores aperienti? Nos vero non in diebus tantum Paschæ, sed per totius anni cur-
riculum ingluviem & heluationes damnamus probè me-
mores, *quod qui talia agunt, regnū Dei non possidebunt.* Gal. v, 21 Viderint autem Pontificii, ne dum ita improbè & calumni-
osè innocentem Ecclesiam traducunt, pars ipsorum sit in ardenti stagno omnibus iis parato, qui amant, dicunt & fa-
ciunt mendacia.

XXXIX. Plures hæreses Aerii Epiphanius & S. August. recensent, sed quia harū ne suspicio quidē in Ecclesiam no-
stram cadit, ob Studiosos SS. Antiquitatū verbō saltē nota-
bimus. S. August. ad Quod vulgredum hæc. LIII. scribit fando se accepisse, quod Aeriani Encratitas vel Apotactitas secuti ad comunionem suam non admiserint, nisi continentes & eos, qui seculo renunciaverint nihilq; proprii possederint, quo ipso monachis & clericis in Papatu, quā Proteftanti-
bus similiore existunt, nisi fortassis Aeriani meliores fu-
erint, cum sæpius monachorum & clericorum papalium in-
continens sit continentia & cælibatus mirificè prolificus. Pauperes videri volunt, ut qui nihil proprii habeant, inter-
rim in luxu vivant & patrimonium Christi abliguriunt. Sed hanc pontificiorum camerinam movere nunc non placet.

Postrema hæresis Aerii apud Epiphaniū est de *Festo Pasche*. Quid est Pascha, aiebat, quod apud vos perficitur? Iudaicis fabulis rursū additi estis. Non enim oportet pascha agere: pascha enim nostrum immolatum est Christus. Epiphanius ita respondet: *Videamus Apostolum, qui dixit: Pascha nostrum immolatum est Christus* (hoc enim dicto Aerius abusus videtur) annon ipse egerit pascha. Is vero festinabat, quo ageret diem Pentecostes in Hierusalem. Qualem autem Pentecosten perficiebat Paulus, si non & Pascha perficiebat? Ostendit videlicet dicto illo apostolico Festum Paschæ non prohiberi, cum ipse Apostolus, cujus est hoc dictum, F. Pentecostes adeoque & Paschatis, cujus complementum est Pentecoste, celebraverit.

XL. Verus dicti sensus est, non esse amplius necessarium, ut Iudaicum pascha situm in occisione agni Paschalis, in comestione azymorum & veterū beneficiorum in Ægypto præstitorū transitusque per mare rubrum memoria à Christianis celebretur, cum aliud Christianis pascha h. e. agnus paschalis sit, *Agnus ille Dei, qui portat peccata mundi*, veteris agni, quem Iudæi olim occidere iussi erant, antitypus, quo semel in ara crucis immolato sacrificia V. I. omnia expirant. Mirum verò est Aerium ad hæc Apostoli verba provocasse, cum si quis ibi de F. Paschæ sermo sit, Aerius iux ipsius sententiæ jugulum petat: statim enim adnectitur: *Itaque nos festum agitemus non in fermento, sed in azymis sinceritatis & Veritatis*. Mens Pauli hæc est: Cum Christus ob peccata nostra occisus sit, fas est, ut hominis Christiani tota vita feriata sit, & nos rebus divinis operemur & à vitiis omnibus, quæ fermenti nomine insignit, feriemur. Summa huc redit: Videtur Aerius (seposito Arianismo) per se & qua talis ob propria dogmata hæreticus non fuisse, sed schismaticus, homo turbulenti ingenii, qui ex mera malitia Veteris Ecclesiæ statuta convulsit, quorum nihil Protestantium Ecclesiæ absque grandi mendacio impingitur. Hæreticus autem haberi potest Aerius, si juxta mores Pontificios sua sibi propria dogmata sub necessitate salutis vel sub anathemate alijs voluerit obtrusa.

DEO

Supremo Veritatis Vindici

G L O R I A !

Cur

Cum Sacram toties Cathedram conscenderit ALTUS,
 Visus difficiles asseruisse theses;
 Cum creber soleat Collegia docta subire
 Impendatque dies ingeniumque libris:
 Cum Studiis addat Pietatem, nec minor illi
 Cura sit, ut rectè vivat agatque benè:
 Forte brevi (voto Numen benedicat ab *Alto*)
 Nomine quod proprio dicitur, ALTUS erit.

Testandi affectus ergo F.

PRÆSES.

Relligio simulacris prisco gaudebat honore,
 Iuppiter Ausonius miserè sua regna videbat
 Quasari & tantum non ima sede moveri.
 Bilemumens igitur sic affabatur amicos:
 O socij, fuimus Troës, nisi dogma Lutheri
 Tollitè è medio, quaquà ratione potestis.
 Dixerat hic, illi Latialia jussa capeffunt,
 Pars ad Scripturam versi, num forse ministres
 Non nihil armorum, pars docta volumina Patrum
 Quarunt; sed causa cunctis nectuntur inanes.
 Inde aliis placuit summa vi rumpere nodum
 Qui solvendus erat; sed & isti lictus ararunt.
 Tandem duxerunt, perfortiter esse boandum
 Nos esse hæreticam prolem & sacra solvere jura,
 Sic fore gens hæc ut penè uno concidat ictu.
 Ast cæcas mentes! & sic invicta manebis
 Dedita gens Christo, rumpantur ut ilia Papa.
 En, confracta jacent tela omnia, contudit & nunc
 Hostem Iliados magnum decus HILDEBRANDVS.
 Si qua tamen superant, celso de ponte cathedra
 Confringes o Tu patria spes alta celebris
 ALTE, suis ausis porro precor optima quaque.

Pzstantissimo & Doctissimo Da. Respondenti amico
 meo honorando hæc scripsi

M. ANDREAS Overbeck.

1036.27



Ditta SALVAREZZA s.a.s.
RESTAURO
Via A. Cervi 5 - Roma



